


CELEBRACIÓN EN OS COTOS

7-8 de xuño do 2025

FESTA DE PENTECOSTE NO FIN DA PASCUA



Os COTOS COA IGUALDADE VERDADEIRA DAS PERSOAS,
COS POBOS QUE SOFREN INXUSTIZA E ABANDONO,
COS REFUXIADOS E MARXINADOS DA SOCIEDADE,
COA NATUREZA MALTRATADA,

E SEMPRE SEMENTANDO PAZ



1.- ENCONTRO DA COMUNIDADE

(tod@s de pé)

@ monitor/a está na sé

SAÚDO DE BENVIDA

🎵 *nº 1 A Cristo cantamos*

Celebrante:

Benvidos sexamos todos a esta celebración. Reunímonos para compartir en comunidade a nosa fe no nome do Pai, do Fillo e do Espírito Santo.

Como fai oito días compartimos con Xesús Resucitado, e con esta festa de Pentecoste poñemos fin á Pascua despois de estarmos a vivila durante 50 días.

Celebramos así hoxe a gran festa do Espírito prometido por Xesús cando se despediu dos Apóstolos: “Voume, pero non vos deixarei sos, voume para enviarvos o meu Espírito”, o Espírito que vive e dá vida no noso interior, o Espírito que coida e alenta á Igrexa para facerse en comunidade.

Os Apóstolos tiñan medo. Péchanse en Xerusalén e esperan. Unha vez que reciben o Espírito de Xesús, abren as portas e comezan a ser testemuñas do Evanxeo, xa non hai medo, agora é tempo de confiar nese Espírito que dirixe o que teñen que dicir e facer.

Para dar vida a esta comunidade todas as mans son boas e necesarias, tamén as nosas. Sigamos facendo unha igrexa viva. Sexamos crentes sen medos.

ACTO PENITENCIAL

Celebrante: *Recoñecemos agora que na nosa vida atopamos atrancos e medos que non nos deixan camiñar e pesan no noso corazón. Para poder ser vida de Pascua temos que pedir perdón recoñecendo que non sempre somos cribles:*

Monitor/a

- ✓ Pedimos perdón polas veces que os medos nos levan a calar e a mirar para outro lado. Señor, énchenos do teu Espírito
- ✓ Pedimos perdón polas veces que facemos da fe un camiño de costumes e rutinas, afogando o Espírito. Cristo, énchenos do teu Espírito
- ✓ Pedimos perdón polas veces que nas palabras dicimos unha cousa, pero no corazón e no espírito facemos outra ben diferente, e acabamos por non ser cribles. Señor, énchenos do teu Espírito

Celebrante: *Deus, Pai agarimoso, ten piedade de nós, dos que teñen un lugar no noso corazón e na nosa vida. A todos concédenos o Señor o perdón dos pecados, a todos ábrenos os ollos á súa Pascua e a todos por Cristo Resucitado nos leva á vida eterna. Amén.*

 **nº 3 Gloria**

ORACIÓN PROPIA DO DÍA

Celebrante: *Rematamos a primeira parte da celebración presentando no silencio o que rebule no noso interior. Facémolo doídos e necesitados de paz, e facémolo coa satisfacción de saber que se conta e se pode contar coas nosas mans.*

(Silenzo)

Celebrante: Deus, Noso Pai, no misterio desta festa de Pentecoste santificas a toda a túa Igrexa no medio das nacións. Ti estendes os dons do teu Espírito dun cabo ao outro da terra e realizas tamén hoxe no corazón dos teus fieis a milagre que o teu amor obrou nos comezos mesmos da vida da Igrexa. Así somos agora nós testemuñas da Pascua de Xesucristo, Noso Señor. Amén.

2.- PROCLAMACIÓN DA PALABRA DE DEUS

(sentad@s) a palabra de Deus proclámase dende o ambón

Celebrante: *O libro dos Feitos dos Apóstolos cóntanos como foi recibido o don do Espírito o día de Pentecoste naquela primeira comunidade dos seguidores de Xesús. Cheos do Espírito Santo xa non tiñan medo, xa non podían esconder o vivido con El.*

No Evanxeo El deséxalle a paz aos Apóstolos e dálles o Espírito para que sexan as súas testemuñas transmisoras de paz no mundo. escoitamos.

LECTURA DO LIBROS DOS FEITOS DOS APÓSTOLOS

Cando se cumpriron os días de Pentecoste, estaban todos xuntos no mesmo sitio. De súpeto, veu do ceo un ruído coma dun forte golpe de vento, que encheu toda a casa onde estaban; e apareceron talmente coma linguas de lume, que, repartidas, foron pousando unha sobre cada un deles. Quedaron cheos do Espírito Santo e puxéronse a falar noutras linguas, conforme lles concedía o Espírito.

Había daquela en Xerusalén xudeus piadosos de todas as nacións da terra. Ao se producir aquel estrondo, xuntouse a xente e ficou moi desconcertada, porque cada un os sentía falar na súa propia lingua. Pasmados e admirados, dicíanlles uns a outros: "¡Olla!. E todos estes que están aí a falar non son galileos?, E logo como é que os sentimos falar cada un de nós no noso propio idioma nativo? Partos, medos, elamitas, xente da Mesopotamia, Xudea, Capadocia, Ponto, Asia, Frixia e Panfilia, do Exipto e da parte de Libia contra Cirene, forasteiros romanos tanto xudeus coma prosélitos, cretenses e árabes, sentimos falar nas nosas linguas das grandezas de Deus".

Palabra do Señor

🎵 *nº 8 ou 55 No colo da miña nai* **SALMO**

PROCLAMACIÓN DO SANTO EVANXEO SEGUNDO LUCAS

Naquel día, o primeiro da semana, ao serán, estando pechadas as portas onde estaban os discípulos, por medo, chegou Xesús, e, poñéndose no medio, díxolles:

- Paz convosco.

Dito isto, mostroulles as mans e mailo costado. Os discípulos alegráronse, vendo o Señor. El díxolles outra vez:

- Paz convosco: coma o Pai me mandou a min, tamén eu vos mando a vós.

E dito isto alentou sobre eles, e díxolles:

-Recibide o Espírito Santo: a quen lles perdoedes os pecados, quedaranlles perdoados; a quen llelos reteñades, quedaranlles retidos.

Palabra do Señor

(sentad@s) gardamos uns instantes de silencio para acoller a palabra no corazón





(en pé) ACOLLIDA DA AUGA

Celebrante: *Fixemos memoria do noso bautismo na celebración da vixilia pascual. Alí compartíamos a auga de toda a comunidade de Os Cotos, e agora aquí ante a auga de vida que nos une en parroquia, queremos lembrar os compromisos, queremos sentirnos confiados en Deus, queremos ser a COMUNIDADE que dá unha man para erguer a cantos homes e mulleres se sinten afundidos.*

Celebrante *Agradecemoslle a Deus os dons da vida cos que El nos agasalla, e facémolo dicindo:*

BENDITO SEXAS POR SEMPRE SEÑOR

Monitor/a

- * Deus creador de todas as cousas, que pola auga e o espírito, nos fixeche renacer á vida do evanxeo
- * Xesús, Ti que convidaches á primeira comunidade a ser testemuña anunciando o evanxeo a todas as xentes
- * Espírito Santo, que fas renacer á Igrexa polo alento da Pascua, e que nos convidas a ser auga viva

RENUNCIAMOS AO MAL

Celebrante *Neste tempo da Pascua, deixándonos alumar pola luz da fe que recibimos no bautismo, renunciemos ao mal porque queremos facelo mellor.*

Monitor/a

- Renunciades a crervos superiores aos outros; isto é: a calquera clase de abuso, discriminación, orgullo, egoísmo e desprezo?

Si, renunciemos

- Renunciades a calar diante das inxustizas e as necesidades das persoas e dos pobos, por covardía, preguiza, comodidade e vantaxes persoais?

Si, renunciemos

- Renunciades aos criterios e comportamentos que fan do diñeiro a aspiración máis grande da vida, e que aprecian a liberdade persoal e o individualismo por enriba da responsabilidade social e da comunidade?

Si, renunciemos

PROFESIÓN DA FE

Celebrante Neste tempo da Pascua, deixándonos
quecer á beira do RESUCITADO compartimos o
credo dicindo **SI CREEMOS**

Monitor/a:

Credes en Deus,
Pai e Nai de todos os homes e mulleres,
que nos agarima nas súas mans
e que conta con nós para mellorar a vida?

SI CREEMOS

Credes en Xesús, o seu Fillo Benquerido,
sempre atento para dar unha man,
e que nos quere dando vida á Pascua
co noso bo facer de cada día?

SI CREEMOS

Credes no Espírito Santo,
que nos alenta esperanza para soñar irmandade,
que nos alenta forza para doernos coa violencia,
que nos alenta paz para sementala por toda a Terra?.

SI CREEMOS

Credes na Igrexa,
unha Igrexa que se fai crible en comunidade,
acolledora, respectuosa e coidadora da terra
e da vida de todas as mulleres e homes
que non contan para ningún?

SI CREEMOS

ORACIÓN UNIVERSAL

Celebrante: Pidamos ao pai que nos dea o Espírito de
paz prometido por Xesús. Digamos:
Verte o teu Espírito

Monitor/a

- ✓ Verte sobre o mundo o teu Espírito de vida, oremos
- ✓ Verte sobre a Igrexa o teu Espírito de santidad, oremos
- ✓ Verte sobre os poderosos o teu Espírito de caridade e servizo, oremos
- ✓ Verte sobre os refuxiados e os asoballados o teu Espírito de respecto e dignidade, oremos
- ✓ Verte sobre os enfermos o teu Espírito de consolo e esperanza, oremos
- ✓ Verte sobre os que reciben os sacramentos o teu Espírito de fortaleza, oremos
- ✓ Verte sobre todos os que te buscan o teu Espírito de sabedoría, oremos
- ✓ Verte sobre a nosa comunidade o teu Espírito de amor, oremos
- ✓ Verte sobre os que sofren a guerra e a violencia o teu Espírito de paz, oremos

Celebrante: Envía, Pai, o teu Espírito para que nos
encha dos seus dons, como nolo prometeu Xesús
Resucitado que vive por sempre eternamente. Amén

3.- OS SIGNOS DA COMUÑÓN CON DEUS E COA COMUNIDADE

NOSO PAI

Celebrante: *Con Xesús queremos rezar a oración que El mesmo nos ensinou. Con ela pedimos ESPÍRITO para nós e para cantos formamos a Unidade Pastoral de Os Cotos. Teñamos presente aos veciños e veciñas que comparten agora á nosa beira facendo comunidade:
NOSO PAI ...*

SIGNO DA PAZ

Celebrante: *“PAZ CON VÓS”. Estas palabras do Resucitado volven ser pronunciadas hoxe na nosa parroquia. Fagamos honor ao noso nome de cristiáns; aollamos a paz e non deixemos de dar exemplo dela no fogar, na parroquia. Sexamos hoxe e sempre homes e mulleres de paz.*

🎵 **nº 36 Fagamos a paz irmáns**

COMUÑÓN

Celebrante: *Na festa de Pentecoste, cincuenta días despois da Pascua, os apóstolos superan os medos e comezan a súa misión de facer comunidade. Nós compartimos agora en parroquia a vida e a fe que nos fai cribles. Ditosos nós convidados a esta festa da Pascua do Señor.*

Señor, eu non son merecente de que entres no meu fogar, mais unha palabra túa abonda para me salvar

🎵 **nº 9 Acharte presente na vida**

4.- AVISOS E DESPEDIDA

ORACIÓN FINAL

Celebrante: *Señor, ti concediches a túa Igrexa os dons eternos. Conserva en nós a graza que nos deches, para que o Espírito Santo sexa sempre a nosa forza, por Cristo noso Señor. Amén*

Hoxe remata a Pascua. A auga do resucitado foinos lembrando que El farta as nosas sedes de evanxeo e nós temos a responsabilidade de ser Vida para os demais.

Tamén a luz do cirio pascual que temos acendido no medio da asemblea ao longo das últimas sete semanas apágase xa; só a acenderemos nalgún dos grandes momentos que afecten a un irmán da comunidade: bautizo, primeira comunión, confirmación, enterro. Os que temos descuberto a Cristo na Pascua, temos que ser agora luz para os demais.

Aínda que agora apagamos o cirio pascual, que non se apague a luz da fe que levamos dentro.

🎵 **nº 1 A Cristo cantamos**

Avísase das misas (ver folla do mes)

**Que teñamos un bo día, unha boa PASCUA
e o Señor da paz, o Resucitado,
nos bendiga †, nos garde de todo mal
e nos leve ao seu fogar de vida eterna. Amén**